

Dahnuengxbiuj Gou

贵港市覃塘区蒙公镇高占小学三年级 Leiz Swjyingz/雷子莹



Gou miz dahnuengxbiuj iq ndeu, heuhguh Dahgyaeu, seizneix ngamq ndaej 13 ndwen hung.

Ngoenzneix gou ndaejhoengq, couh caeuq daxmeh bae ranz de guhcaemz. Bae daengz ranz de, de ngamq ninz banringz hwnq, gou heuh sing “Dahgyaeu”, dah lwgmaet neix dingqnyi le, couh cienq ndang gvaqdaeu, yungh fwngziq oiqt de nu-nu lwgda, yawjraen gou le, mbe hai aen bak iq, riunyumj lo. Yawj, hauilai nanz mbouj doxraen lo, de lij roxnaj gou bw. Song ceh da ndaemndet itcig muengh gou, lumjbaenz doiq gou naeuz: “Cejbiuj, mwngz ndei!”

Dahgyaeu bizbwdbwd, gig miz-yinx. Byoem de miz di raez, cungj daengj hwnj mbwn bae lo, caen dwg “byoem ndat biengj mauh” ha! Lwgda luenzlulu, aen ndaeng mejmet, lij miz aen bak rox riu dem, caen nyex vunz gyaenz ha! Ceiq hawj vunz sim-gyaenz dwg de naengnoh youh hau youh oiqt lo. Dingqgangj aen siengq ndaej

hop bi de lij hwnj densi gvaq, daeng gvaq bauqcej ne!

“A……a……” Dahgyaeu heuh gou, lij soemxsoemx saxesax byaij coh gou. Baez neix, gou mbouj gaen de guhcaemz yaep ndeu mbouj baenz lo. Gou hawj de naengh gwnz ga gou daeu, gou saenqsaenq ga, yaengyaeng gangj: “Neuz neuz nenj, neuz neuz nenj, daek doengh nenj, nenj haexvaiz……” De itmienh dingq, itmienh ngauz gyaen, gij yienghcej de lumj fiz lo. Seizneix, de lumj fatyienh gijmaz ityiengh fwngz vix gwnz buh gou. Gou baez yawj, yienzlaiz dwg gwnz buh gou duz “nouiq” yinx de cimyawj. Ndigah, gou doiq de gangj: “Neix dwg ‘nouiq’”. Byawz rox. daxmeh lwnh de baihlaeng gou lij miz duz nouhung dem. Yienghneix, Dahgyaeu engqgya angq lo, heuh gou cienq bae cienq dauq, hawj de yawj song duz nou haenx. Gou cij ndaej dawz buhrog duet roengzdaeu, hawj de yawj gaeuq bae.

Ceiq mizyinx dwg Dahgyaeu gwn doxgaiq lo. Gou dawz naed dangz QQ coq henz aen bak iq de bae, de iet linx riz baez ndeu, couh nyaeuq da hwnjdaeu, lumjbaenz gig hoj gwn ityiengh, gvaq yaep ndeu, de sijsaeq sawq gwn le, cij riunyumj lo. Dahnax gangj, Dahgyaeu gwn gijmaz doxgaiq cungj dwg yienghneix. Dah fangz iq neix caen cing ha!

Seizgan mbouj caeux lo, gou aeu baema lo. Dang gou caeuq Dahgyaeu gangj “caiq raen” seiz, de gig sij mbouj ndaej, doeklaeng guh aen “cup” ndeu coh gou “mbin” gvaqdaeu, daihgya cungj riu lo. Ndaw sim gou siengj, de itdingh maqmuengh gou baezlaeng caiq daeu, dahnuengxbiuj, cejbiuj itdingh ra seizgan caiq daeu yawj mwngz.

Dahnuengxbiuj gou Dahgyaeu dwggyaenz lwi? Gaej yawj de lij iq, gizsaed de yienghyiengh cungj singj, couh dwg caengz gangj ndaej ok.

(bouxlauxsae son' gyauq: Cinz Cinhdonz/覃珍团)

Dahnuengx gou

上林县大丰镇中心学校四(2)班 Vangz Meizdanh/黄梅丹

Dahnuengx gou ngamq ndaej song bi, cabheiq youh ndeigyaez, ciengzseiz hawj vunz ndaw ranz nyaengq mbouj dad.

Miz baez ndeu, daxmeh dawz gvehoengz cuengq youq gwnz daiz, cab baenz lip baenz lip, dahnuengx raen le, gaem hwnj daeu couh haeb gwn gaemz hunghung nei, gvehoengz ceh doek youq gwnzdieg, dauqcawq cungj miz, raemx gvehoengz doek gwnz namh. Gou caeuq daxmeh yawj mbouj gvaq da, couh dawz gaiqdohbaj mad dibanj, hix aeu baengz mad. Dahnuengx lumj mbouj raen dou nyaengq, lij dwg ciuqyiengh gwn, caen mbouj miz maz banhfap.

Lij miz baez ndeu, dou ma ranz daxbuz guhcaemz. Daxbuz cingq youq dingjlaeuz dak haeux, gou cix bae bangcoengh. Gou caeuq daxbuz baet gij naed haeux sanqhai youq itheij. Dahnuengx raen le, cix dawz nyangj-baet baet haeux. Gou caeuq daxbuz

itcig nyinhcaen baetseuq, hoeng dou fatyienh haeuxgok vihmaz sanq ok-daeu engq lai? Ngeuxgyaeu yawj, dwg dahnuengx loengh doeng loengh sae, de cungj dwg baet doeng baet sae, haeuxgok dauqcawq sanq, caendwg yied coengh yied luenh. Mbouj miz banhfap, gou cij ndaej daiq dahnuengx bae lo.

Lij miz baez ndeu, dwg ban-haemh, gou bang dahnuengx swiq-ndang. Gou cuengq dahnuengx roengz ndaw batraemx hung, de naengh youq ndaw batraemx neix, haenq-rengz bekraemx, raemx sinz daengz gwnz ndang gou dumz lo. Mbatmbat bang dahnuengx swiqndang cungj lumj bae hoenxcienq nei.

Yawj ba, dahnuengx gou dwg mbouj dwg gig iu, danhseih dwg mbouj dwg hix dwggyaenz dangqmaz ne?

(bouxlauxsae son' gyauq: Vangz Gveiyangh/黄桂香)



Langhnaeuz Gou Goj Miz Gouh Fwed Ndeu

Langhnaeuz gou goj miz gouh fwed ndeu, baeznduj gou mbin bae gizlawz lai ndei ne?

Gou yaek mbin bae Baekging gonq. Daxboh naeuz, Baekging miz Denh' anhmwnz hungmbwk lai, mbaw geiznding haj aen ndau-ndeiq haj gak guek raeuz couh-dwg daj gizde swng hwnjdaeu doekgonq. Gwnz bya Baekging miz Singzraez Fanhleix hungmbwk dangqmaz, daengx lajmbwn cungj rox liuxliux.

Gou yaek mbin bae Baekging gonq. Daxmeh naeuz, bae Baek-ging ginggvaq Gveilinz, gizde miz bya miz raemx ndei gvaq lajmbwn. Lij ginggvaq Dahcangz-gyangh Dahvangzhoz dem, youq ndaw guek raeuz, song ga dah neix cei q hung cei q raez.

Gou dauqma liux, couh guhneix lwnh daxboh nyi: Boh ha, gou byaij gvaq baihnaj Denh-anhmwnz lo, lwg benz gvaq Singzraez Fanhleix lo. Boh ha, gou naemj mbouj daengz, mwngz coj angqfaengz baenzmaz bae!

Gou dauqma liux, couh guhneix cam beixmbauq: Beix ha, beix bae gvaq Denh' anhmwnz lwi? Beix bae gvaq Singzraez Fanhleix lwi? Beix raen gvaq byaraemx Gveilinz lwi? Beix raen gvaq Dahcangzgyangh Dahvangzhoz lwi? Beix ha, gou caen ngeix mbouj daengz, mwngz hozhaenz gou baenzmaz bae mbw.

Beix ha, mwngz lij siengqgya baenzlai lwi? Mwngz lij naeuz gou baenz daeghuk, gijmaz cungj mbouj rox lwi?

(Daj《Bonjsei Sim Lwgnyez》(Veiz Gizlinz raiz) senj okdaeu, Lwgfwngzmeh/卢奋长 hoiz)